

永樂大典

七二

228599

成都工學院圖書館

卷 〇七三六	卷 〇七三五	卷 〇七三四	卷 〇七三三
郎字	郎字	郎字	郎字



永樂大典卷之七千三百三

十八陽

郎

戶部侍郎

沿革周禮地官小司徒建大夫馬福臨曰職同其任也後附休國官奉侍郎則清楊帝置隋書百官志楊

帝大業三年定令戶部置侍郎一人正四品以貳尚書之職又改戶部為民部以異六侍郎之名舊唐書職官志戶部侍郎二員正四品下

宋改易名使皆隨尚書七掌天下田戶均輸錢穀之政令其屬有四一曰

戶部二曰度支三曰金部四曰倉部總其職務而行其制命凡中外百司

之事由於所屬皆質正焉新唐書百官志高宗即位改民部曰戶部龍朔

二年改戶部曰司元元定元年改戶部曰地唐會要戶部侍郎改復名獮

與尚書同本一員垂拱四年四月十一日加一員以武攸寧為之蘇氏記

曰故事度支案郎中判入員外郎判出侍郎統押案而已官銜不言專判

度支至乾元元年十月第五琦改戶部侍郎帶專判度支自後遂為故事

至今不改若別官來判度支郎云知度支事或云專判度支貞元四年

二月。上以度支自有兩稅及鹽鐵。推酒錢物以充經費。遂令收除陌錢及開官料。并外官開官職祿及減員官課料。令戶部侍郎實參專掌。以給文武官料錢。及百司紙筆等用。至今行之。三年四月。勅戶部侍郎兩員。自今已後。先授上者。宜令便判錢穀。如帶平章事。及判鹽鐵度支。兼中丞翰林學士。即不在此限。仍為永例。職畧宋戶部之職。皆歸三司。元豐官制行。戶部始總邦計。置侍郎二員。宋史職官志。戶部侍郎二員。並從三品。掌軍國用度。以周知其出入盈虛之數。凡州縣廢置。戶口登耗。則稽其版籍。若貢賦征稅。歛散移用。則會其數。而頒其政令焉。凡四司所治之事。侍郎為之貳。郎中員外郎。叅領之。獨右曹事。專隸所掌。侍郎若事屬本曹。郡縣監司不能直者。受其訟焉。大饗祀薦饌。則尚書奉俎。飲福則徹之。朝會則奏百物。左曹分案五。置吏四十。右曹分案五。置吏五十有六。建炎兵興。嘗以知樞密院張慤。提領措置戶部財用。後遂中書侍郎。仍兼之。五年。復以叅知政事孟度。提領措置。後罷。專委戶部長貳。左曹分案三。曰戶口。掌凡諸路州縣戶口升降。民間立戶分財。科差人丁。典賣屋業。陳告戶絕。索取妻男之訟。曰農田。掌農田。及田訟務。限奏豐給。賑水旱蟲蝗。勸課農桑。諸佃地主。令佐佐滿賞罰。獻奏諸州雨雪。檢按灾傷。逃絕人戶。曰檢法。掌凡本部

檢法之事設科有三。曰二稅。掌受納驅磨隱匿支移折變。曰房地。掌諸州
樓店務房廊課利僧道免丁錢。及土貢獻物。曰課利。掌諸軍酒課。比較增
虧。知通等職位姓名。人戶買撲鹽場酒務租額酒息。賣田投納牙契。外有
開折知雜司。右曹分案六。曰常平。掌常平農田水利。及義倉振濟。戶絕田
產。居養鰥寡孤獨之事。曰免役。曰坊場。曰平準。各隨其名而任其事。曰檢
法。曰知雜。裁減吏額。左曹四十人。右曹三十人。淳熙十年。詔左藏南庫撥
隸戶部舊制。戶部侍郎二人。中興初。止除長貳各一員。或止除尚書若侍
郎一員。紹興四年七月。詔戶部侍郎二員。通治左右曹。自此相承不改。宋
司馬溫公官制遺藁。戶部有貢賦侍郎。度支侍郎。鹽鐵侍郎。金史百官志
戶部侍郎二員。正四品。泰和八年。減一員。永泰二年。復舊。掌戶籍物力。蠲
恤離嗣。田宅財產。鹽鐵酒麴。香茶器錫。舟粉坑冶。權場市易。度支開用。俸
祿恩賜。錢帛實貨。貢賦租稅。府庫倉廩。積貯權衡。度量法式。給授職田。拘
收官物。并照磨計帳等事。元經世大典。戶部侍郎。中統元年。左三部侍
郎二員。至元元年。為戶部侍郎二員。五年。置一員。七年。復置二員。二十三
年。定以二員為額。元史百官志。戶部侍郎二員。正四品。掌天下戶口錢糧
田土之政令。凡貢賦出納之經。金幣轉通之法。府藏委積之實。物貨貢賦

之真。歛散准駁之宜。悉以任之。至元中。以戶部所掌視他部。特為繁劇。增置二員。國朝諸司職掌。戶部左右侍郎各一員。並正三品。掌天下戶口田糧政令。按古其屬有四。曰民部。度支。金部。倉部。洪武二十三年。為天下庶務浩繁。欽改為十二部。曰浙江。江西。湖廣。陝西。廣東。山東。福建。北平。河南。山西。四川。廣西。各令清理一布政司。戶口錢糧等事。仍量其繁簡。帶管直隸府州。每一部內。仍分為民。度。金。倉四科。以領其事。其有應令行移。內外衙門文書。俱各案呈本部。參詳允當。然後施行。

事實唐書列傳。盧承慶。遼民部侍郎。太宗間。歷代戶版。承慶叙夏商至周。隋。增損曲折。引據該詳。帝嗟賞。俄為檢校兵部侍郎。知五品選。嚴挺之為尚書右丞。時宰相李林甫引蕭吳為戶部侍郎。常與挺之同行。慶弔客次有禮記。吳讀曰。然嘗伏獵。吳早從官。無學術。不識伏獵之意。誤讀之。挺之戲問吳對如初。挺之白張九齡曰。省中豈有伏獵侍郎耶。由是出為岐州刺史。林甫深恨之。王彥威開元六年。召拜戶部侍郎。尋判度支。彥威儒學雖優。亦勤吏事。然貨泉之柄。素非所長。會邊軍上訴。水賜不時。無之。朽故宰臣惡其所為。分攝度支人吏。付臺推訊。彥威畧不介懷。入司視事。及人吏受罰。左授衛尉卿停務。方還私第。李絳。遼戶部侍郎。帝以戶部

故有獻而絳獨無。何哉。荅曰。臣為陛下謹出納。烏有美餘哉。若以為獻是
從東庫物實西庫。進官物結私恩。帝震然悟。牛僧孺拜戶部侍郎。初韓
弘入朝。以宣武舊事人多疏言者。班列之中。悉受其遺。俄而父子俱卒。弘
幼小。穆宗恐為廝養竊盜。乃命中使至其家。閱其宅簿。以付家老。而簿上
具納賂之所。唯於僧孺官側。朱書曰。某月日送牛侍郎物若干。不受。却付
訖。穆宗按甚悅。居無何。議命相。帝首可僧孺之名。李元軫。歷工兵吏三
侍郎。上令宰臣及公卿已下。精擇堪為戶部者。多有薦李元軫者。將授以
戶部尚書。執政以其資淺。未宜超拔。乃拜戶部侍郎。元軫因條奏人間利
害。及時政得失以奏之。上大悅。因賜衣一副。孟簡由工部侍郎進戶部
加御史中丞。戶部有二員判使按者。別居一署。謂之左戶。元和後。選委華
重。宰相多由此進。崔群既相。而簡代之。張平叔。長慶中為戶部侍郎。獲
除大官。因王播以進。既掌財用。常屈公利。以使私。嬖倖多狎之。既有寵於
上。進退便僻。雜優譎。咸自稱老奴。復無大臣之體。嘗奏事畢。降階復升。又
有論奏。仇璽輕脫。上每為容容之。在班列間。玩狎郎吏。諱肆無忌。權璽法
請宰相為之使。因以自求。樞機之任。每有內制出入。輒疑授已。整衣冠以
俟。後人多笑之。韋表微。遷中書舍人。俄拜戶部侍郎。職如故時。自衣履

實曆國家比有變故凡在翰林遷擢例無滿歲由是表微自監察六七年間秩正貳卿偶承恩渥歲于一時楊瑒為戶部侍郎召大臣議戶部瑒言利病甚詳帝咨實滿孟陽讓知戶部侍郎詔駢驛江淮視財賦孟陽恃氣豪倨所至招金錢多補吏黎望大喪使敬休字順之為戶部侍郎奏兩川米價騰踴百姓流亡請罷兩川關官職田祿未以救貧人從之金華東陽志馮國字昌之連中進士宏辭科大中時終戶部侍郎判度支群書足用韋維遷戶部侍郎善裁剗時員外宋之問善詩時稱戶部二妙元一統志涇州趙昌言以叅知政事罷為戶部侍郎自知澶州徙涇州太宗喜其鎮安有勞改義州慶陽府范純粹自直龍圖開京東路轉運使改知慶州時夏人不庭純粹謂諸路策應舊制也自徐禧罷策應若夏人大舉一路攻圍力有弗勝而隣路拱手坐觀其不拔者幸爾謂宜脩明戰守救捷之法朝廷是之元祐中除實文閣待制初神宗問罪夏人取其安疆改慶州圖米脂四寨又取蘭州至是議分畫疆界趙尚在延州純粹在慶州以為得之無益於中國純粹請以夏人所陷官吏丁夫歸朝廷而以所削之地給賜之於是還以四若而夏人服又為戶部侍郎張商英宗徽宗朝知隨州召為戶部侍郎嘗題瀆陰亭詩云駕言展出岷臺隅瀆上登

臨酒拍壺不似峴山羊叔子心隨漢水欲吞吳。延安府孫覽以寶文閣侍
制知渭州。改知延安府保障有勞於吏事。先勸人為戶部侍郎。宋史元祐
五年。主議者執開河減水之策。戶部侍郎蘇轍上疏諫曰。臣為戶部右曹
郎中。戶部休戚計在此。河若復減。然誰當言者。惟斷在聖心。盡罷其議。
周葵兼權戶部侍郎時。孝宗數手詔問錢穀出入。葵奏陛下勞心庶幾日有
咨詢。若出人意表。今皆徵文細故。此必有小人乘間欲售其私。不可不察。
蓋指龍大淵曾觀也。孝宗色為動。沈作賓為戶部侍郎時。軍興之餘。國
力殫耗。見存金穀。僅支旬月。作賓考通負稅吏數。閏三月即有半帑之餘。
周益公大全集柳約字元禮。權戶部侍郎。感教奮厲。悉力盡言。凡例外宣
索皆執奏以進。制文苑英華唐孫逖授韋濟戶部侍郎制。勅朝散大
夫守京兆少尹奉明縣開國男韋濟。衣冠士。文雅清才。德忠信於身。謀
傳孝友於門。德明而克允。遇理必通。剛則近仁。臨事能斷。自升華省。追佐
神州。皆有令名。咸歸雅望。地官之亞。朝選允難。我其試之。無替厥命。可試尚
書戶部侍郎。散官封如終。後韓滉戶部侍郎制。門下同有地官小司
徒。佐敷五教。魏宣度。文尚書。以濟軍國之用。政有餘地。然可兼之。正議大
夫行尚書右丞韓滉。惟先臣左右烈祖。格于皇天。濟美之盛。中朝所重。好

學師古。察其清純。文不流穢。言無枝葉。素練成式。用推至公。所更之任事。可垂遠。久司臺轄。嘗亦官人。無吏無寵。其情羣才各序。其一作於位。今戶版不實。地征未均。每歲經費。以之匱竭。邇者命使以聽領。且非典故。擇郎以專掌。又慮權輕。歸于有司。期在折衷。昔杜元凱之處斯職。內以利令外以教遠。法可施行者五十餘條。以資當時之急。委注煩重。宜熟計之。可行尚書戶部侍郎。專判度支。散官如故。王者施行。蘇頲撰授源乾曜。戶部侍郎制。黃門正義。大夫行少府監。上柱國。安陽縣開國男。源乾曜。思總事端。言思政要。外則經通成務。內則周密知微。其識也清。以文守法。南方受賁。已稱寶玉之府。司徒帥屬。更重神仙之聞。宜副朝獎。莅于邦教。可行尚書戶部侍郎。散官勲封如故。王者施行。李虞仲撰授學士王源中。戶部侍郎制。勅竭誠於補察。必罄計謀。鋪文於詰命。以先鳴業。非明識。優經於體遠。農藻已著於知微。則何以副我虛求。允於任使。翰林學士。中散大夫。中書舍人。上柱國。賜紫金魚袋。王源中。天籟無器。大珠不磨。範圍可以程指。紳刀尺可以制度量。自拔於郎署。賓諸中禁。嘗因進見。敷奏以言。揖黃憲而褊亢不生。親汲黯而風神自整。今時方無事故。政在和乎。外付股肱。內倚心腹。必冀協恭以奉上。營道而同方。保下無間言。上無偏聽。萬務

故繫朕時賴之勉勤夙夜之規以副簡求之望可尚書戶部侍郎知制誥
依前充翰林學士散官勲賜如故白居易長慶集牛僧孺可戶部侍郎制
勅戶部侍郎周之地官小司徒也掌天下田戶之園生齒之籍朕後貨
幣之政令以待國用而質歲成元和以道日益寵重善其職者多登大任
中茲選者莫匪正人誰其稱之我有邦彥朝議郎守御史中丞上柱國賜
紫金魚袋牛僧孺自舉賢良踐登臺閣東潤邑宰後糾繆綱而書命無繁
詞決事無留獄受寵有憂色納忠多苦言朕心知之何用不可夫以人會
之重如彼僧孺之賢若此俾居是職不亦宜乎可尚書戶部侍郎散官
勲如故張平叔可戶部侍郎判度支制勅故事君使臣其道不一或
先勞而後受賞或先加寵而後責功蓋宜便有後先時事有緩急故耳朝
議大夫守鴻臚卿無御史大夫判度支上柱國賜紫金魚袋張平叔國之
村臣也計能析秋毫吏畏如夏日司會逾月網條甚衆况師旅未息調食
方急倚成取濟非爾而誰故自大鴻臚換居人部造膝而授不時而遷其
要無他足欲急吾事而望倚爾功也公卿以降群有司盈庭然問曰與吾
坐而決事丞相已下不過四五而主計之臣在焉非智能則事不可成非
諒直則吾難近噫臧局之外得不思稱官望而厭我心乎可尚書戶部

侍郎判度支散官勲賜如故時長慶二年三月制元稹長慶集搜崔稜尚書戶部侍郎制勅朝議大夫權知尚書戶部侍郎判度支上柱國賜戴金魚袋崔稜惟朕憲考亟征不庭熏剔幽妖擒滅罪疾用力滋廣理財是切而姦臣乘上之急刻剗以充其求常用憫然思免憂濟乃詔南服傳置甚繁爾稜授以耗登之書俾陳生聚之術善於其職嚴而不殘辟名用物者逃無所入減私奉公者得以自明吏不敢欺人不加賦公費當其所則不吝上求非其故則不獻挺直廉厚真為吏師試可甄明歲滿當陞朕保其始爾思其終始終不渝乃可用人可守尚書戶部依前判度支散官勲賜如故宋劉牧彭城集朝奉郎試中書舍人蘇轍可戶部侍郎制勅國賦之入邦用之總察其盈虛乃可以調度當其有無則可以散聚主計之任司會之事在文昌推為劇曹故朝廷用為精選具官某天材穎茂儒學純備敏於事而慎於言志於道而輔以術早繇方閭之衆藉甚士林之譽粵自諫垣進陟詞掖倘儻正論啓沃者非一潤色玉猷顯靈乎吹萬以將刃之餘地宜摧材而重任是用進聯地官貳司邦計夫六府三事正德為之本經賦入中正為之法爾無俊常以益上志近而忘遠則民生厚而王化隆矣其慎之哉可鄴鄒郎漢集職方員外郎呂希道父翰林侍讀學

士右司郎中公繇可贈尚書戶部侍郎制 仁皇帝時丞相之子孫能自
奮於世累富貴而不傾者惟呂氏比諸家為最顯何其積善之為多耶其
官某父其官其丞相齊公之後淹通雅正深於文學嘗侍先帝誦古史有
闡切諷諭之勞夫能究其用先時以歿今其子又以治行方為尚書郎履
其平而趣吾見其進也則獲章密印將重累以告其廟詎止於此而已乎
可蘇東坡大全集李之純除戶部侍郎制 勅保國備保身後石不如養
氣御民如御馬鞭箠不如輕棄故興利以富民不如省事而民自富廣求
而豐國不如節用而國自豐朕嘉與庶工共行此志以爾中大夫直龍圖
閣知滄州李之純屢試以事稱循良雖為有司不吝出納宜膺蹕等之
用庶無虛受之譏服我訓言以厥公議可特授依前中大夫試尚書戶部
侍郎即進此言改除修撰河北道使魯筆元豐類藻戶部侍郎制 田
生為之籍殺帛貨泉之計下以制民之產上以經國之用地官之戒實參
總焉朕方因能以用今正名以授職俾服予事必惟其材某項以通敏之
資父經要劇之任往副民部孰如汝宜夫知農之艱難而有以勸助視財
之豐薄而有以均節使公嚴瞻足而私畜羨盈朕將觀爾之能爾其無懈
予位元豐懷遇集朝散郎試戶部侍郎楊汲可朝請郎試戶部侍郎 勅

夫子奪所以示勸懲而音始於近者思稱于義惟日至公其官某祇藏夙
勞受茲旌寵而官常糾職拜法嚴焉稽令閏年復其舊食加于幼安終則
有辭可呂淨德先生集實文閣待制權知開封府韓宗道可戶部侍郎制
左右侍從之臣朕待之無間也外則王畿之政以經又萬衆內則文昌
之貳以總領庶務寄任皆重要之得人其官某才資博通志尚中立忠良
之訓能世其家懼悌之心克施有政滋試猷為之善久安禁近之職天邑
之繁既踰年而成政地官之副宜分任以責能况此要途蓋為萬物爾其
體節用裕民之意謹量入為出之規勉續前功輔成大計除戶部侍郎
制周之制以九賦九貢錄財致用而以九式均節之入有藝陞出有度
數是以民不告勞而經費無不足此王道之資也今天下大計歸于地官
凡盈虛登耗之差損益輕重之理必審處而後行則建正立威可不慎哉
其官某忠正出於天資彊明通于世務多藝故能從政知義可以理財故
命以小司徒之職俾任其事爾其體節用裕民之意謹量入為出之法輔
成大計以稱朕心蘇魏公集翰林學士守尚書禮部侍郎范鎮可守尚書
戶部侍郎勅夫廣記備言之書編年繫日之史古稱善志時謂難才矧
乎仁祖之聖德神功一朝之文紀武律載述之任刊輯良勤既克成於信

書宜顯褒於直筆。以爾其官。其識通器遠。學富文高。內庭嘉猷。納之謨東。觀預編序之選。發凡起例。有古良史之風。積忠潛精。成我一王之法。奏篇甫上。懋賞宜優。中臺常伯之職。左戶地官之威。叙陞厥秩。用獎爾勞。往膺遠渥之華。益彰猷為之美。可歸。勅。陞陽集左司郎中。除戶部侍郎制。勅。朕惟司會。實掌邦賦。天下人安田疇。日闢生齒。日繁財非。患不足患常在。於有司。不良則取之浚深。而用之濫溢。公私咸病焉。是故地官之職。智不能察。盈虛。術不能知。輕重。則吾不以為之。至於贊舉籌策。計耗登殖。為貳卿。實不輕授。其官甚。智略通敏。處煩彌約。學識閑備。雖微必燭。久為軍士蔚有休聲。按其成勞。可以大受。故舉理財之柄。將觀富入之蘊。然而其事繁雜。要切就利。爾既以仁賢進。為朕謀其大者。古今沿革之宜。經費本末之術。其悉乃心。以佐邦教。可洪文安公集左朝請大夫尚書左司員外郎部大受。除權尚書戶部侍郎制。文昌六職。共底於事功。地官貳卿。實司於經入。執副劇煩之任。必惟彊敏之求。其官甚。植行安和。受材高邵。名聲早著。彌嚴樂之華精。智畧自將。得妍桑之心計。久茲留落。屬爾審騰。外臺高刺。衆之威。軍士著獨輪之効。擢升榮路。獨付民曹。錢穀問其幾何。朕方期於裕國。會計當而已矣。爾益務於能官。其體忱言。以祇異渥。右朝議

大夫克秘閣修撰。新知明州臺卒。除權尚書戶部侍郎制。朕清心省事。永惟恭儉。以化民理財正詞。庶幾仁義而利國。孰副盈虛之寄。必求通敏之材。其官某論議闇明。資質朴茂。五蛇為輔。早辨露綬之忠。駟馬乘車。連上麾符之最。地從驛召。吏遣卿聯。方分名郡。以有行。載念舊人之無幾。肆茲及汗。曾不淹展。常伯司元。遂貳六官之峻。貴臣近主。密參兩省之華。其益勵於老謀。以各揚於休命。翟忠惠先生集顯謨閣侍制陳彥文除戶部侍郎。太宰經制。國用惟時。司徒修厥官。用贊太宰。朕惟理財有政事。立藝于民之中。有能典朕邦計。其試可哉。其官某服勞有處。承事不懈。若金發硎。以用不剝。俾爾往貳政典。協德于農父。凡我六卿之亞。茲惟近臣。民用視數。其爾導利于上下。正辭初載。無矜谷出。納為誦功。欽哉周麟之海陵集湯允恭除權戶部侍郎制。朕用人之長。蓋將以式序在位。分職而治。亦幾乎各安所施。惟時詳練之才。宜服浩繁之寄。其官某抱能膚敏。東志篤誠。嘗於學古之餘。達是理財之要。總賦全蜀。深得遠民之心。司均大農。博知當世之利。洎賜環而入覲。即持案以升班。念當案弓矢而戢干戈。豈武部可矜方畧。欲使實倉廩而充府庫。惟版曹正賴於幹旋。雖邦用之耗登靡常。然民財之取予有制。若其兼足上下。在爾審調盈虛。往懋宿官。

之勞。益據富國之策。太府卿徐宗說除權戶部侍郎。中臺六職分庶務之宏綱。民部貳卿。參衆臣之高選。爰稽已試。蓋得其人。具官某。以機敏達事。經以通才。了邦計長于貨府。謹頒授之。惟時攝是版曹。嘉幹旋之有素。比嚴三歲之祀。實董一司之繁。迨此消成。允宜褒陟。夫禹時用政。足食為之先。周興建官。理財居其半。矧是版曹之設。實惟邦計之專。非深知乎本末源流。必自困於簿書期會。不有能者。孰堪付之。具官某。敏健無人。精明博物。以儒選而有適時之用。以通經而得富國之方。昔同琬琰之就。煥鑒重嗟。中廢今若。麟騶之開道路。益見老成。與其踟躕。遠用於他司。孰若試實才於劇部。宜頒新命。俾易貳卿。夫天不能貧。在乎強本。而節用。惟國無妄。責則不傷財。而害民。朕方深信於仁賢。汝尚均齊於調度。蓋思善後。務究嘉猷。可。榮兼除權戶部侍郎。衆言利者。病於不知義。善足國者。貴乎能富民。若時邦用之。耗登繁。爾版曹之濟否。具官某。老於吏事。富有能名。以三十年附翼之臣。久焉留滯。凡二千石承流之地。多所踐揚。幸存綿上之善人。猶是正元之朝士。徙居輔郡。入守行都。謂下車之可觀。意餘力之未殫。是用擢升計部。參

戴列卿朕方歌南風阜民之詩下西漢教本之設經常之有制宜取予之
 惟時母親小利而較雖刀之微母事虛文而忘雀鼠之耗當體朕意益殫
 汝為可趙令詔除權戶部侍郎漢九卿之高位缺則選諸循良唐三
 省之從臣問亦求之督利朕參用前制作典庶工令得人於輔漢傳或事
 于計部具官某材力獲濟器資銳明以帝王之本支而躬寒素之風以公
 子之信厚而臨疏通之畧累官于外厥績有聞五駕駟車每應條而輒舉
 再分符竹茲將刀以無勞與其借洪河之潤於近封孰若觀利器之施於
 繁委乃召從於中閭俾入掌於民曹况嘗通延閣之班可使蹈榮途之轍
 若夫總國家之大計究財貨之本原倉儲缺散之權錢幣重輕之制朕不
 深告爾皆習知往其善謀副我虛佇可胡寅斐然集張致遠戶部侍郎制
 孟子談農桑於戰爭之際光武勤稼穡成中興之功王道所先民食為
 急今百姓已弊六師方張將竭澤而漁豈無後患不加賦而足安得此言
 若時版曹慎選卿或具官持心近厚經德不回黜總利權獨推善計輒從
 選部往佐司元必使下不病民上能裕國頭會箕隸罔貽今昔之譏食足
 兵強一晒乾坤之憤是為稱職可不勉哉周益公大全集權工部侍郎兼
 臨安少尹沈復除權戶部侍郎勅拜命司徒在親百姓為稱善政惟叙